

# Häfe-Zunft Brönzau

## Schnitzelbänke

2003

### Aidu, aidu, aidu schöner, aidu schöner Schnitzelbank!

Guete Tag, liebi Lüüt mehr düend euch rächt härzlech begrüesse ond wette euch weder einisch, met es paar Schnetzubänk s'Läbe versüesse. Vöu esch passiert im letschte Johr, wäg em Schuelhuus, z'Mättewil, g'rotet me sech fasch i d'Hoor. D'Gmeind duet sech böuzig för e Wald angaschiere ond wett öberau Fahrverbot montiere. Met em nöie Waldgesetz duet's ou de Riiter a Chrage goh, dörfe sie doch bald niene me, de Wäg verloh. Doch Schloss jetz, met dene politische G'schechte ond loset, was mer hüür händ chönne dechte!

### Hett dä do ned d'Farb verwächslet? Mou, dä do hett d'Farb verwächslet!

Zomene feine Ässe esch es Glas Wy e G'noss. das bereitet de Fennerecrew grad echli Verdross. Voller Stouz düend si de Rot Traminer i d'Wycharte näh, das tuet der erscht Gascht de grad chli Übel näh. Wo d'Serviertochter dä feini Tropfe präsentiert, g'hörsch grad echli es Glächter, het dä Wy plötzlech im Chäller d'Farb g'wächslet? Nei, de Rot Traminer esch vo Natur us e wisse Wy, das bringt am Hämpu de mächtig Ärger ii. Är persönellech het dä Wy deguschtiert gha, g'schwend, esch är de ement no Farbe-blend?

### Esch das ned e tolli Sendig? Mou, das esch e tolli Sendig!

D'Käser Annelies tuet's g'niesse, während em Fernseh luege d'Blueme z'giesse. So, jetz nome no s'Wasser obe i s'Töpfli lääre ond guet ufasse we die i de Glotze chäre. Doch ei Sprotz het sis Ziel ned troffe ond scho esch die Cheschte nömmme g'loffte. So Lisi, dä Schade esch perfekt, der wäre wahrschinlech g'schiiter d'Blüemli verreckt!

### Hett dä ned e Fehlgreff g'macht? Mou, dä hett e Fehlgreff g'macht!

Be Sonne, Wend ond Räge, duet's eim d'Hoor scho präge, drom gett's jo ou 3-Wetter-Taft, för d'Hoor seig das de beschti Saft. De Hoffmann Wernu, i de Vorstadt dehei, benötzt drom ou dä edli Spray. Es gett do nomme eis Problem be dere Sach, wenn'd nemmsch di fauschi Dose us em Fach. Imprägniermettu hett är g'noh, dä armi Tropf, demet die Hoor gha händ, of sim Chopf. Öppis, Wernu, wette mer der säge, imprägniere nöttz nomme gäge Räge!

### Chonnt dä do ned hortig hei? Nei, dä chonnt ned hortig hei!

No es Bier im Piz-Paz g'nüsse, so wott sech de Grazzi de Fürebe versüesse. Doch nach eim Bier het är noni gnue ond vergesst, dass är sött hei zue. Carola het nämlech kocht ond esch of hondertachtz, wöu de Grazzi so lang i de Beiz ome prasst. E Greff zom Telifon ond is Piz-Paz kable, ehre Ehemaa söu sofort deheim a'trabe. Das Telifon werd no es zwöits Mou g'startet ond scho het's ime chline Ehekrach us g'artet. Met de Pfanne ond s'Chochguet debi, so fahrt sini Gattin jetzt im Piz-Paz i. Do hesch dis Z'nacht, chasch wiiter Biere, wenn'd kei Zyt fensch, zom hei marschiere!

### Duet dä do ned komisch spare? Mou, dä do duet komisch spare!

De Woodtli Petu duet d'Altguuger zom Probe zitiere, dass si de im Däschu am Kehrausball chöi brilliere. Wöu är ou no Kasse duet verwalte, duet är sech grad echli kuurlig verhalte. E Brief met A-Stämpfu nur met 70 Rappe frankiere, do wird sech Poscht secher ned schiniere. Doch dä Schoss goht leider hende use, s'esch en Gruus, jedem Metglied flatteret e Zahligsufforderig vo mene zwänzgi is Huus. So muess haut jede, wo Probedate wott vernäh, e Gang zom Poschthalter of sech näh!

### Duet die ned sennlos Gäud vernechte? Mou, die duet sennlos Gäud vernechte!

E sones Handy duet hött nömm vöu choschte, drom duet ou d'Buchmüller Silvia am Sohn eis poschte. Me chönn det sogar s'Konto vo deheim us föue, das mach i jetz, dänkt d'Silvia vo de Tröue. Nor rasch es paar Zahle töggelet si ii ond scho sötte 50 Franke of em Sohn sim Konto si. Hätt di guet Frou ou nomme di richtig Nommere töpft, wär das Gäud ned be mene andere of s'Konto g'höppt!

### Hett die ned e guete Schlof? Mou, die hett e guete Schlof!

Ou e Chatz muess schröckli liide, wenn'd ere muesch e Zischte schniide, Drom duet's Lerch Frida gnau überlegge, met zwe Schloftablette wott si dä Moudi lahmlegge. G'schlofe hett dä Moudi de schnäll ond d'Frida schnäfflet met em Skalpell. D'Operation esch de guet verloufe, nor de Kater g'sehsch nie me omeloufe. Wäg em Schloofmettu hett di Chatz müesse öber d'Chlinge sprengte, lueg, Frida, aus cha eim haut ned emmer g'lenge!

### Düend di do ned Wösch entsorge? Mou, die do düend Wösch entsorge!

Zom e Wöschtümpler abmontiere, muess de Elektro-Murer im Bäre uf marschiere. Die beide Stromer, de Gehret und de Chreschte, mache sech dra a die Wöschtröchnigs-Cheschte. Stecker use, s'Kabü weg, ond nüüt me goht, do chonnt sogar Bäre Trix no spoht. D'Maschene händ si scho i de Abfau-Moude versänkt ond debi gar ned de Huufe dänkt. D'Entsorgig vo dem Elektroschrott cha me so ned lo si, de Trix ehri Wösch esch nämlech no i de Trommle gsi!

### Verdient dä ned de Sold bem legge? Mou, dä verdient de Sold bem legge!

Ou vo de FÜRwehr het's hüür weder e Schnetzubank gäh, düend sech doch einigi Lüüt ganz komisch benäh. Wo e Alarm chonnt duet sech de Bienz Hansrüedu teschte ond we e Sprinter i voller Montur zom Huus us hetze. Doch plötzlech chonnt em i Senn, oh Gruus, Blutspende esch hött im Chelegmeindhuus. Sofort duet är de omdischponiere, de Chare chere ond i s'Dorf abe chiere. Wo är fertig esch met sim Aderlass, macht är sech weder aus FÜRwehrlor of d'Gass Ganz am Schloss vo de Üebig esch er zue g'schleche, drom werd de FÜRwehrsold ou no begleche!

### Sötte die ned lere zäutle? Mou, die sötte lere zäutle!

Einisch es Formel-1 Rönne live erläbe, so dänke s'Töög i und de Lerch Hämpu, s'wär ned denäbe. Of Magni-Cours abe, duet me de fahre ond ou es Zäut metnäh, zom Chöschte spare. Det onde a'cho, wett me de s'Zäut uf stöue ond scho get's e Schnetzubank z'verzöue. Ohni Zäutstange, s'esch ganz verreckt, händ si sech haut met de Zäut-Blache zuedeckt!

### Esch das ned e Werbeparty? Mou, das esch e Werbeparty!

Emmer mitte November duet d'Guggemusig ehri Feschtfähigkeit teschte ond das esch met de Fasnachtseröffnig, öppis vom Beschte. Met de Planig duet me bes i s'chilinschte Detail drengte, sones böuzigs Feschtmuess doch schliesslech g'lenge. S'ufstöue esch fertig ond d'Gäsch send do ond scho hett de Planer Wüesch Chregu fasch e Härzschlag öbercho. A so me Feschtmu, wenn d'Lüüt zahle ond d'Kasse passiere, muess me die doch irgendwie markiere. Doch was wott me do ou no wiiter studiere, d'Gäsch duet me eifach met emene Radio-TV Graber Stämpfu traktiere!

### Esch das ned e Poscht-Überfau? Nei, das esch kei Poscht-Überfau!

Vo Gehret Röbu's ond Kohler Küsu's, esch Gross ond Chli, aui aus Zueschouer bim Powerman debi. D'Jungmanschaft muess de mou of s'Töpfli goh, das esch de aber gar ned guet use cho. Das Stöui-Örtli, wo im Poschtbüro duet si, esch nämlech kei normal Schissi gsi. E Chnopf, wo d'Alarmalag uslöst, esch det montiert ond scho händ d'Chend det dra ome handiert. es Sireneg'hüel i de höchste Töne, tuet jetzt is Dorf use dröhne. Eimou Fehlalarm, hätt jo wörkli g'längt, doch grad zwöimou händ si s'Poschthalters ome g'sprängt!

### Düend sech die do ned verlüre? Mou, die düend sech do verlüre!

Am Nöizuezügerräff trefft me sech im Däschu, zom Deguschtiere, zom de nohhär öber öisi Storche g'meind z'debattiere. Nachdem de Vortrag öber öisi Wasserversorgig fertig esch gsi, ladt de nöi G'meindrot Frei Poul zor Besichtigung vor Ort i. I eim Gjofu duet är zom alte Pompwärch ue röcke, zom si det met ere Besichtigung z'beglöcke. Doch die Lüüt wend und wend ned cho, do esch em de plötzlech d'Erlüüchtig cho. Wöu die nöie Stüürzahler d'Gmeind besser kenne, das esch e so, händ si de Wäg zom nöie Pompwärch under d'Räder gno!

### Duet dä ned sis Outo vermesse? Mou, dä duet sis Outo vermesse!

Öppe mou e Jass chlopfe, das muess si, ou de Buchmüller Willi, esch öppe debi. Im Longhorn osse, aber, hett d'Silvia Outo-Not, wöu e fröme Chare hender erem Mercedes stoht. Am Willu sis Outo, goht ehre dore Grend, stoht bem Däschu, das holi jetz g'schwend. So chonnt's, das de Willi d'Polizei loht lo cho, Diebe heige ehm si Wage gno. Bou-Chlötz händ's g'stuonet, ond de Willu het g'wätteret, wo de d'Sile of e Parkplatz inne brätteret. Be de Schmier seit me ehre, das tüei öppis choschte, gäu Silvia, wärsch g'schiiter z'Fuess go poschte!

### Duet dä ned e Traktor versänke? Mou, dä duet e Traktor versänke!

Ou vom Zemmerli Petu im Grod get's öppis z'verzöue, bem i'wauze vom Rossmesch duet er sech komisch a'schtöue. So duet är met em Traktor of em Mescht ome chiere, nomme so cha me dä richtig komprimiere. Doch s'Ganze esch wäg de Nässi vom Mescht ned so g'loffte ond scho esch er met de ganze Bänne versoffte. Nor no e Outochrane het dä Traktor chönne rette, schösch wörd dä hött no i dem Schiessdräck stecke!

### Esch das ned es Empfangskomitee? Nei, das esch keis Empfangskomitee!

De Graber Tönu chonnt vo England hei ond seit för's Abhole z'Klote, gar ned nei. Scho send's unterwägs die SBB-Strategie, de Aeschlima Ürsu met sine Kollege. Warte tuet me de im Terminal A, doch troffe händ's ne ned, dä Ma. Ou s'Sueche im Terminal B, chonnt dene Bähner ned i Senn, onderdesse hocket de Tönu im Schnäu-Zog enn. Am Zoffiger Bahnhof händ si ne de g'seh, drom froge mer öis, tuet das ned e chli weh?

### Händ die ned e Panne gha? Mou, die händ e Panne gha!

Wo de Mabu und de Caro vom Pontonierwettkampf düend heifahre, bereitet ne plötzlech z'Zoffige onde Verdross, dä Chare. Vor eme Fuessgängerstreife macht dä Chare kei Wank, logisch, s'esch jo kei Moscht me im Tank. Im ganze Städtli duet de Mabu e Benzinquelle sueche, do foot är de plötzlech a fo fluche. Mit ere Goggifläsche muess är z'letscht zur Tankstell marschiere, mer hoffe, das komische G'mesch duet dä Motor de ned irritiere. So ne Resevekanischer wär jo scho e feini Sach, de hätsch de ned no met de Goggifabrek Krach!

### Hett dä ned e Bock abschosse? Nei, dä hett kei Bock abschosse!

E Jagd cha faszinierend si, drom lade d'Jäger d'Behörde i, triibe söue si, das Wöud vor d'Böchs, ob Reh, Hase oder Föchs. De Bögli duet ou i sim Versteck verharre ond hofft, das em es Tierli sprengt vor d'Knarre, es knackt, es raschlet hender sim Rögge, jetz muesch handle ond scho duet sech di Loft i Blei verwandle. Los Ernst, met dere Flente duet me ned im Züg omehantiere, schösch duesch, statt s'Wöud, d'Behörde dezimiere. Ond was chasch us dere G'schecht jetz lehre, dass me sech ned während em Schiess duet chere!

### Esch dä do ned Schlössu touglech? Nei, dä esch ned Schlössu touglech!

A de Powerparty muess de Hämpu de Passepartout näh, wöu me seit, dä Schlössu cha me ned jedem gäh. Doch wo's de weder om s'Abgäh goht, chonnt de Hämpu ordeli z'spoht, de Schlössu heig er g'suecht, es seig e Gruus, im G'schäft, Verosse ond im Huus. Nüüt heig är g'fonde, är wärdi nömm g'schiiter, vellecht höufi nomme no e Wahrsäger wiiter. Dem hett me de a g'lüüte ond är seit gli, zwösche Kabu, Röhrl i ond G'römpu muess dä si. So duet de Hämpu de G'schäfts-Chare dornuele ond fendt de Schlössu zwösche zwe Kabuspuele. Lueg, Schärer, mee Ornig im Chare, chasch Zyt ond Helseher spare!

### Düend die do ned hendersi schaffe? Mou, die do düend hendersi schaffe!

Der Unterhalt vom Stromnetz esch för s'EW Pflucht, drom get's vo de nöie Arge EW ou es Gedeckt. S'Stange uswächsle esch kei Sach, di Herre wäre nämlech scho vom Fach. Di nöi Stange werd uf g'stöut ond verschwenkt ond die alt a de Seilwende a g'hänt. Es het knischeret ond krachet, chum händ's zoge, scho send dene Stromer fasch Stange ond Dröht om d'Ohre g'flogte. Die Borschte händ lang g'stuonet ond öberleit, beid Stange send ne nämlech a Ranze g'heit!